

Henny Eman:

Cu e sentencia di diamars, campaña a cuminza



Ex prome ministro di Aruba, Henny Eman, a ofrece un conferencia di prensa na cas di su mama ayera tardi, caminda e a duna un splicacion di loke a sosode ultimo lunanan cu a duna su famia y e mes un preocupacion sumamente grandi.

Aki el a bisa cu nan ta un famia politico cu tin cuater generacion cu na un manera honesto y cu tur integridad a traha duro y a duna parti di nan bida na Aruba.

Cu un stem carga cu sentimentonan, Eman a bisa cu tempo e tabata politico activo el a yega di pasa den momentonan dificil, pero cu nunca manera el a pasa aden ultimo lunanan ora cu ministerio publico a dicidi di hacie sospechoso di valsheid in geschrifte y fraude den casonan caminda e no tabatin nada di haci cune. Inicialmente el a wordo tendi como testigo, pero despues nan a declare sospechoso, cu a trese cune un situacion dificil y fastioso pa su famia y pa e mes. “Mi a para dilanti decisionnan grandi, pasobra si nos a laga e caso bai dilanti manera normal e ta sosode lo mi a keda den e ambiente di criminalidad pa basta aña, paso nos ta sigur cu ora nos gana e caso –paso nos lo a gana e caso den Prome Instancia- lo bai apelacion y lo bai probablemente te Casacion, kermen lo mi tabata den e ambiente di criminalidad pa basta aña”. Eman a bisa na prensa presente.

Tambe e a bisa cu e proceso cu nan a start ta uno sumamente excepcional pa cual tur su conseheronan a bisa cu e posibilidad pa gana ta menos cu 1%. Normalmente Hof lo a kita e dagvaarding for di mesa, si berdad ta absolutamente imposibel pa Ministerio

Publico por a yega na e dagvaarding ey.

“Mi tabata asina convenci, no solamente dimi, sino di mi coleganan minister cu a traha cumi, nos hendenan tabatin e mesun integridad cu mi tin y mester a duna e ehemplo di bai den e proceso dificil aki”, ex prome minister di Aruba a duna di conoce.

E a splica cu e tabata un proceso complica, cu tabata muestra sumamente dificil y pesey e ta asina satisfecho, primeramente pa su famia y naturalmente pa su ruman hoben cu ta den politica awor y cu lo a wordo afecta si e lo a haci esaki y no a logra.

E proceso tabata pa elimina e dagvaarding, pa elimina e acusacionnan, Eman a expresa, no gana e caso na final, pero elimine na principio caba y esey a logra pa tur cinco parti di e dagvaarding cu tabatin encera den dje criminalidad di berdad, e a continua. Es decir, e

Cinco acusacionnan a worde retira y e unico punto cu a keda ta esun di un discusion ariba presupuesto, esta un ley cu nan mes a introduci, pero cu nunca no a worde aplica ainda.

Segun Henny Eman, e hueznan mes ta bisa cu e ta un ley nobo, caminda tin discusionnan entre e cientificonan, entre e profesionalnan, y pa esaki Eman no tin ningun problema pa e bai dilanti huez y duna un splicacion amplio den futuro riba kico esey ta encera.

Pa Henny Eman e punto principal di ayera tardi ta pa bisa cu ora gobierno a cambia, e gobernantenan nobo cu a tuma over, manera den pasado, por kere cu tin hendenan cu berdad pa generacionnan ta



traha na bienestar di Aruba cu boluntad y integridad.

“Si mira loke ta sosodiendo awe, cuanto caso tin di hurmamento di edificio di primo, ruman. Cuanto caso tin di persecucion iregular, ilegal bo por compronde cu nan nunca lo por kere cu tin gobernantenan cu a base di idealnan, a base di principionan, a base di honestidad, integridad ta goberna e pais aki”, segun Eman kende a continua bisando cu ta pesey e gobernantenan aki a bin cu un comision cu lo a bai investiga profundamente “no pa sera un par di chikito ey bou, cu a comete seguramente, manera ta muestra, iregularidadnan, ilegalidadnan. Tabata pa gara nos. Mescos cu a sosode den e caso di Beta, mescos nan kier a gara nos, no ta cuestion di idealismo di nan banda, integridad di nan banda. Nan no por kere cu tin hende honesto”. Pesey e a bisa cu e ta contento cu Aruba tin su hueznan y su sistema hudicial, caminda nan semper a demostra confianza den e sistema aki, cu ta un di e miho systemanan di mundo y ta pesey e a dicidi di bin cu e caso aki.

Na final ex prome minister Henny Eman a mada un palabra di advertencia grandi: “E direccion cu e gobernantenan aki a tuma, e direccion y e intencion cu tabatin tras di esaki no ta wordo lubida cu e sentencia di ayera. E politiconan di awe mester pensa cu tin un mañan y mester pensa cu nos mester eleva nos systema politico na uno cu tin respet pa otro, na uno cu berdaderamente e sytema democratico ta funciona ariba e nivel cu nos tur ta desea...Cu e sentencia aki mi ta kere cu eigenlijk e campaña a start”.